

107-ч номертә совхоз джирн негн минъгън хөотә болхмн

Хө өсгәгънә болн ноос икәр авлгъна тускар бичси КПСС-н Центральн Комитет болн СССР-н Министрмүдин Советин бичгиг Приютненск района 107-ч номертә совхоз байрта кевәр тосв. Совхозин фермсәр, өвснә хадлгъна бригадсар КПСС-н Центральн Комитетин болн СССР-н Министрмүдин Советин бичгин туск цәалгъврин кәдлмш сәәнәр кегддж йовна.

Совхозин хөбчнр дундас хөбгъән гару угагъар асрдж, хургълх 718 хөөнәс 924 хургъ ах хөбч Иван Цибулевский авб. Ах хөбч Пластаман Максим 100 хөн болгънас 125 хургъ авб.

Совхоз 1960 джил күртл 61000 толгъа хө күргддж өсгдж, хөн болгънас 6,2 килограмм ноос авх даалгъвр батлдж авб.

Мн болгъна тоод мах, тос болн үс гаргългъар Америкин Соединени Штатсиг өбрхн джидмүдин эргцл күцддж авхин тускар партин болн правительствин тәвсн төрт хәрү өгч, государствд мах икәр орулдж өгхин кергт 107-ч совхоз хальмг тохмта бод мал икәр өсгхәр шииджәнә.

Ирх үвләс хөбдән таргън-ца халнъгар болн гару угагъар авч гархин кергт 20798 гектар газрт ургъмл өвсн хадгдхмн. Терүнәсн 9832 гектар

газринь хадчкси бәәнә. Өвс хадлгънд кәдлдж йовх улс дундас трактористнр Василий Лахнев, Степан Кулькин болн Иван Кравченко өдрин 40-д гектар газр хадхин ормд 55-60 гектар хаддж, норман 140-150 процент күцәцхәнә.

Эн совхозин фермсәс 2-ч ферм өвс хаддж скирдлгъярн түрүн нуурт йовна. Зурагъар 5762 гектар газрт өвс хадх бәәснәсн 2800 гектар газринь хадчкв. 1700 гектар газрин өвсн хурагдад, скирдлгдв.

Өвс скирдлгънә кәдлмшт түрүн өдрәс авн даалгъвран күцәдж йовхнь Болдырев Бальда, Мучкаев Сандж болн Сармаков Михаил. Эднә бригад 560 центнер өвс скирдлв.

Эн совхозд үвләр хургълх 1600 хөн багтх нег дулаң кошар болн 800 хөн багтх шалашин өнъгтә гурвн кошар бәргдлжәнә. Фермсәр, хөбчнрин бригадсин хошад өрк-бүл бәәдг арвн гермүд бәргдджәнә. Тосхлтин кәдлмшт өдрә норман давулдж күцәдж йовх Афанасий Рябоконеv болн Купоносов Алексей хойр каменщикүд өдрә норман 150-160 процент күцәцхәнә. Совхозин коллектив малин хотин көрнъ икәр белддж, хөн болн үкр малан сәәнәр хардж-хәләдж, государствд ик ноос, мах өгхәр кәдлдж йовна.

ЭЛЬДАН ЭРДНЬ.